

Cussagl da cumün

Protocol nr. 21 da ls sezzüda dals 27 schner 2010

Tagl da laina Pignai

Pel tagl da laina da Pignai surdà il Cussagl las lavuors da: preparar, trar cul fil e transportar la laina a l'impraisa forestala Cla Duri Janett da Tschlin. Cul schmerdscher vaina cumanzà in favrer. In marz vain fat il transport da la laina.

Provedimaint d'aua, squitsch

Ün proprietari da chasa ha rendü attent al cumün cha pro el saja il squitsch da l'aua blier massa bass e cha las armaturas sajan schmerdadas. Per megldrar la situaziun stuves el montar ün indriz per augmentar il squitsch da l'aua. Per nu s-chaffir pregüdizis nun es il Cussagl pront da surtour ils cuosts per üna simla installaziun. Las taxas annualas (fundamentalas ed adöver) ch'el paja es calculada per la preparaziun e pel transport fin pro la lingia privata. Il cumün nun es in dovair da pisserar per las installaziuns in chasa.

Società chinologica Engiadina Bassa, imposta da chans

Plüs accidaints tanter chans ed umans han chaschunà grondas discussiuns. Per evitar quai, spordschan diversas societats chinologias in Svizra cuors per educaziun da chans. La società chinologica Engiadina Bassa dumonda al cumün per gnir incunter cun l'imposta per quels proprietaris chi'd han absolt il cuors e fat il brevet. Las entradas da l'imposta da chans cuvernan malapaina las sortidas pel svödar e mantgnair las tualettas da chans (Robidog). Implü füssa da far ün müdamaint da la ledscha d'impostas chi'd es gnüda revaisa be avant bundant ün on. In vista a quists argumaints decida il Cussagl da na agradir la dumonda.

Fundaziun "Art Edgar Vital"

Il Cussagl es perinplet da surdar seis 30 purtrets dal pitur artist Edgar Vital our dal relasch „collecziun Fontana“ a la fundaziun „Art Edgar Vital“. Il cumün dess esser preschaint cun ün cusglier obain cusgliera illa suprastanza da la fundaziun „Art Edgar Vital“.

Uorden per l'adöver da la chasa da scoula/sala polivalenta, taxas

Pro arrandschamaints sco bals faja dabsögn da cuvernar il fuond. Quel vain fixà cun ün bindel da tachar. Per cuvernar ils cuosts implü decida il Cussagl dad augmentar la taxa per fr. 50.-- voul dir sün fr. 250.--. Per arrandschamaints chi nu fa dabsögn da cuvernar il fuond resta la taxa sün fr. 200.--. La pedella surdà e surpiglia las localitats. Scha quellas uras da lavur surpassan duos uras, schi ha la società da surtour ils cuosts implü.

Suost per gera Sainas

Il lavuraint da cumün ha pardert ün per savas cun muoster per la paraid dal suost in Sainas. Il Cussagl es persvas da quellas e decida da far tuot la paraid cullas savas cun muoster.

Manader tecnic

Il cumün da Tarasp dumonda da pudair tour a fit al manader tecnic d'ürant il mais mai. Lur capolavuraint ha congedi. Il manader tecnic es perinplet, uschè cha'l Cussagl decida da til imprastar pel temp dumandà.

à Porta-Barblan Jon e Monica

Ils conjugals Jon e Monica à Porta-Barblan han l'intenziun da fabricar üna chasa sülla parcella nr. 2736 in Fionas. Il Cussagl decida da reservar la parcella per ün on, voul dir fin la fin da favrer dal 2011.

Il capo: sig. Reto Pedotti

L'actuar: sig. Andri Florineth

publichà als 02/02/2010